



## **Antonia Monn-Curschellas**

### **18.10.1930 - 09.09.2008**

Nossa mumma Antonia ei naschida ils 18 d'october 1930 sco quart affon da Barla Catrina e Luis Curschellas-Berther. Ella ei carschida si ensemens cun treis frars e duas soras a Surrein. La scola ha ella frequentau a Sedrun. Gest suenter quei temps da scola ei ella stada en plazza a Savognin ed a Sargans. Cura ch'ella ei turnada a casa tiels geniturs per segidar el tenercasa e sil funs. ha ella empriu d'enconuscher il giuven Giachen Giusep Monn da Cavorgia.

Igl onn 1956 ein els maridai e secasai a Camischolas ella casa dils Berthers. Niessegner ha schenghegiau a lur lètg siat affons, quater buobs e treis buobas ch'els han tratg si ensemens plein carezia. Avon dus onns havein nus tuts astgau festivar cun ellas las nozzas d'aur. Sper tut la lavour d'educaziun ed en casa, ha ella adina capiu da prender peda per ella, seigi quei cun ir per izuns, tgirar sias fluras ni far in viadi cun siu consort Giachen Giusep. Ses diesch biadis ein stai ina gronda pissiun da nossa mumma. Ella ha fatg da pigliar e dau bal cun els, ed ensemens han els giu bia legher. Mintgin dad els ha regurdientschas specialas da lur tatta.

Sia malsogna maligna ha fatg ad ella ils davos onns adina pli grev da sedustar persula. Cun agid da siu um e dalla famiglia, surtut da sia feglia Barla, ha ella saviu star tochen avon dus onns en siu da casa. La sanadad da nossa mumma ha lu buca pli lubiu da star vinavon a casa era buca cun tut agid d'ordeifer. Igl ei stau ina nundetg greva decisiun per la famiglia, da schar ir ella en la casa d'attempai. Mirau anavos ei quei denton seguir stau la megliera decisiun per nossa cara mumma. Ella ha astgau guder leu buna tgira cun carezia tochen il davos. Nossa mumma ha viviu ruasseivlamein. Ella ei ida da nus ruasseivlamein.

Cara mumma. Nus engraziein a ti per tut tua lavour per ils bials muments e per tua gronda carezia. Nus selegrein sin in seveser cun tei. Ruaussa en pasch.

La famiglia en malencurada